

## REGIONAL NEWS

HEADLINES:-

1. Damdawia a thlawna inenkawlina, Mizoram Health Care Scheme hman mek chu tun thla chung hman tura pawh sei leh a ni.
2. Commerce & Industries Minister Pu F. Rodinglana chuan handloom chu Mizo hnam ziarang phochhuahna leh humhimna kawnga hmanraw tangkai tak a ni mek a ni a ti.
3. Prime Minister Narendra Modia leh Vietnam PM Pham Minh Chinh te vawiin khan New Delhi-ah an inkawm.
4. Paris Olympics 2024 ah vawiin khan Indian shooter Swapnil Kusale chuan bronze medal a la.

&lt;&gt;&lt;&gt;&lt;&gt;

HEALTH CARE SCHEME

Mizoram Health Care hman mek chu Mizoram Universal Health Care Scheme-a thlak ala nih rih loh avangin tun thla thleng pawh sei a ni a, hei hian health care pawisa hman zo tawh te a huam lovang.

Health Department hotute hnen atanga thudawn danin healthcare scheme thar tur hman theih ala nih loh avangin Health Care Scheme hman mek chu chhinzawm zel tura ruahman a ni a, a bill erawh tihfel hun tur a hriatloh tih sawiin chhinchhiah danah tuna Healthcare scheme hman mekah pawisa la tihfel loh mi 3230 bill, cheng vbc 11 nuai 41 sing 4 & 4,398 a awm mek a, hei hi July ni 18 thlenga chhinchhiah dan a ni.

&lt;&gt;&lt;&gt;&lt;&gt;

DISASTER RELIEF FUND

Mizoram Sawrkar chuan kumin May thlaa Cyclone Remal in Mizoram hmun hrang hranga chhingatna a thlen chhawmdawl nan sawrkar laipuah cheng vbc 200 a dil.

Tunhnaia chhingatna hrang hrang thlengah hian mi 37 in nunna an chan a, chhengkaw tam takin an chenna in chhuahsanin hmun hrang hrangah kawngchhia leh bungraw chhia tam tak a awm a ni.

Disaster Management & Rehabilitation Department in RTI zawhna an chhannaan an tarlan danin kumin May ni 28-a Cyclone Remal thlipui tleh avanga nunna chan zat chu mi 34 an ni a, heng bakah hian in leh lo a tihchhiat 1,196 awmin heng zingah hian luah tlak tawhloha chhia in 201 a awm a. In chhe nasa 149 awmin thawm that theih maia awm in 699 a awm a, thlam 147 a chhe bawka a ni.

Cyclone Remal in chhingatna hrang hrang a thlenah hian mahni in leh lo chan an awm nual a, heng Cyclone Remal avanga thil chhia hrang hrangte a sum faia a hlut zawng chu cheng nuai 17 bawr vel niin Department chuan a tarlang a.

Nimin piaha National Disaster Management Authority Technical Expert Group lokal te chuan Cyclone Remal avanga chhingatna thleng leh tunhnaia khuarel chhingatna hrang hrang thleng te hi an tlawh kual mek a, naktukah hian an haw leh dawn a ni.

&lt;&gt;&lt;&gt;&lt;&gt;

#### NATIONAL HANDLOOM DAY

Commerce & Industries Minister Pu F. Rodingliana chuan handloom chu Mizo hnam ziarang phochhuahna leh humhimna kawnga hmanraw tangkai tak a ni mek a ni a ti.

He thu hi vawiina Millenium Centre Exhibition Hall, Aizawla National Handloom Day vawi 10-na lawmna puala Ministry of Textiles, Govt. of India leh Commerce & Industries Department-te tangkawp buatsaih 'Hathkargha Mela/State Handloom Exhibition', August ni 1 atanga ni 14 thleng awh tur a hmanpuinaah Minister chuan a sawi a.

Minister chuan Handloom kaltlangin Mizoram hmun hrang hrangah mi eng emaw zatin eizawna ngelnghet an neih phah a ti a. Handloom-in hma a sawn zel theih nan Mizote kutchhuak chawisan leh ngaihhlut nachang hriat chu mi tin mawhphurhna a nih thu sawiin, hnam ziarang nasa zawka phochhuah a nih theih nan Commerce & Industries Department-a thawktute chuan Handloom lam a tui mite an kaihruai fo a pawimawh a ni a ti a. Minister chuan Sawrkarin kuthnathawk, hlawhtlin tuma beitate tha tichak tura tanpuina pek a ngaih pawimawh thu sawiin, Handloom lama tui mi, 'Hand holding Policy' hnuiaia tanpui tlakte dapchhuah leh tanpui dan tur ruahmanna siam turin thawktute a chah a. Mizo kutchhuak Handloom hrang hrang tih hmasawn nan 'State Handloom Exhibition' chu hlawhtling taka kalpui turin duhsakna a hlan a ni.

State Handloom Exhibition-ah hian dawr 60 an in phochhuak a, tun thla ni 14 thleng a awh dawn a ni.

<><><>

#### SAMPOORNATA ABHIYAN

Ramchunga District leh Block hnufual te chhawmdawlina tura sawrkar laipuiin a ruahman Sampoornata Abhiyan chu Lunglei District chungna mipui zawng zawngin an chhawr theihna turin inhrilhhriat kawngah chak taka hmalak mek a ni.

Lunglei Bawrsap Pu R. Lalthazuala sawi danin thla hmasa ni 5 ah Lunglei District-ah beihpui thlak niin Lungsen block-ah hmalakna chak taka kalpui mek a ni a ti a. Hmalakna tur atana thlan chhuah chu mipui vantlang tana hmasawna tur leh changkan theihna tura zaa za thlen tir an tum tih sawiin September thleng awh a nih avangin Line department inrawlh hrang hrang ten theihtawp an chhuah dawn a ni a ti a, hmasawna chak zawk a awm beisei a nih thu sawiin tihlawhtlin vek a nih chuan hmasawna lian tak a thlen ngei dawn a ni a ti.

Sampoornata Abhiyan hnuiaia hian thla 3 chungin tehna chi hrang hrang - hriselna lam kaihnawih, nu naupai hriselna endik, raipuarin chaw tha a dawn dan, BP leh zunthlum kum 30 chunglam test te, Agriculture Department hnuiaia Soil Health Card siam te leh Self Help Group ten tanpuina an dawn dan te chu tehna tlangpui tur a ni a.

Sorkar laipui, NITI Aayog hmalakna Sampoornata Abhiyan hi July khan Mizoram chungna District pathum ah kalpui tan a ni a, September ni 30 thleng kalpui tur niin hetah hian Aspirational Block, RD Block pathum hnufual bik dawm kan ngai thlan chhuah a ni a, Mizorama RD Block pathum Ngopa, Lungsen leh Reiek RD Block-ah te hian thla 3 chungin hma an sawn theih nan hmalakna hrang hrang kalpui a ni dawn a ni.

<><><>

#### MNF JT MEETING

Kumthar lama Local Council inthlan lo awm tur atana inbuatsaih nan MNF General Headquarters, Elected Office Bearer-te leh Aizawl khawpui chungang MNF Local Council member ten vawiin khan Mizo Hnam Runah ah joint meeting an nei a.

He joint meeting hi Dr. R. Lalthangliana, Sr.Vice President chuan kaihuaiin, Local Council member-te nena inbuatsaih lawk a tul thu a sawi a.

MNF Treasurer, Pu Lalruatkima pawhin he hunah hian thusawiin MNF chu political party a ni satliah lova, hnam thuthlung kengtu a nih avangin MNF Local Council Member-te chu an chungang mipui mit a fu bik a ni a ti a. Hna an thawhna reng rengah tha takin an ti zel tur a ni a. Mahni veng chungang amahni mamawhtute chu an hawisan tur a ni lo," a ti.

He joint meeting-ah hian Aizawl City Local Council Association hruaitute hnen atangin hmalak tawhnate leh tuna MNF-in Local Council-a rorelna an neihna te leh party dangin Local Council-a rorelna an channa te ngaihthlak a ni. Tun dinhmuna ACLCA hnuai Local Council dinhmun hriat theih chinah Aizawl Khawpuia Local Council awm zat chu 85 a ni a, MNF LC---73, ZPM LC--- 6 leh Cong LC--- 6 an awm a

He meeting-ah hian MNF party hmasawn zelna tur leh insawhnghehna tur te sawiho a ni bawk.

<><><>

#### CHAMPHAI FOREST DIVISION RELEASES GRANTS IN AID

Vawiin khan Champhai Forest Division hnuai ramsa in lo leh huan thlai a tihchhiat sak te leh ranvulh a tihhlumsak te hnenah zangnadawmna hlan a ni.

He zangnadawmna, grant-in-aid wildlife compensation hi kuthnathawktu mi 17 te hnenah Champhai DFO Pu Lalbiakchama Chawngthu chuan hlan a. Tun tum a grant-in-aid wildlife compensation pekchhuah zawng zawng hi cheng nuai 2 sing 4 sang 9 za 6 sawmruk panga a ni a. Nikum chung khan mi 6 paruk hnenah wildlife compensation pek niin, a vaia sum pek chhuah zat chu cheng nuai 4 sing 1 sang 6, 500 a ni bawk.

Champhai DFO Pu Lalbiakchama Chawngthu chuan nungchate'n mihringte tana harsatna leh tawrhna an thlenin sorkarin zangnadawmna kum tin a pe chhuak thin tih sawiin, zangnadawmna dilte an dilchhan a dik ngei em tih enfiah a nih hnuah zangnadawmna pek a nih thin thu a sawi a. Zangnadawmna hmu turin dilna rintlak leh a finfiahna, kimchang nen a huna taka thehluh a pawimawh thu a sawi bawk a ni.

Tun dinhmunah buh leh thlai hmun hectare khat zelah cheng 5000 zel zangnadawmna pek theih a ni a. Ramsa in mihringte a beih a vanga nunna chan an awmin cheng nuai 2 pek theih a ni bawk. Ramsa pel avang leh chhaihkawlh hmasak avanga hliam tuar emaw, nunna chan an awm chuan zangnadawmna pek theih an ni lo thung a ni.

<><><>

#### ECM

Evangelical Church of Maraland (ECM) in ram pawna chanchintha hril tura missionary a tihchhiahna Ni,- Ramthim Ni vawi 58na chu vawiin khan ECM kohran chuan urhsun takin awmni khamin an hmang

Kum 1966 Aug.1 khan ECM chuan Missionary hmasa ber Evan. A. Khosa chu Burma ram ah a tir a, he ni hi ECM kohran chuan urhsun takin kumtin a hmang zui a, mission rawngbawlina a infuih tharna ni atan a hmang thin a ni. ECM Hqrs. chuan kumdang ang lo takin kumin hian Mission Week chu July ni 29 atangin

Aug.4 thleng hmang turin programme a duang a, zantin inkhawmna neiin thupui hrang hrang siamin Pathian thuchah mission lam hawi ngaihthlak thin a ni. Kumin mission week leh Ramthim ni- Thupui atan "Khawvel zawng zawng ah kal ula, thilsiam zawng zawng hnenah chanchintha hi hril rawh u" tih hman a ni. Vawiin ramthim ni hmannaah hian chawhma lamin Inkhawmna neih a ni a, chawhnu lamah Pathian thu leh hla a inpawl hona bakah ranthim pual fehchhuahna hun hman thin a ni.

ECM kohhran ah hian member 50000 dawn an awm a, mission field 7 leh partnership in field 5 neiin Mission hnuai hian thawkty mi 300 vel an awm mek a ni.

<><><>

#### PRIME MINISTER AND VIETNAM PM

Prime Minister Narendra Modia leh Vietnam PM Pham Minh Chinh te vawiin khan New Delhi-ah an inkawm. Hruaitu pahnihte hian Vietnam-a Nha Trang-a tunhnaia din thar Army Software Park, Telecommunication University ami chu internet kaltlangin an hawng a. He park din nan hian India leh Vietnam te hi an thawkdun a. US Dollar maktaduai nga Vietnam hnenah hian India chuan a pe a ni.

Hei bakah ihan hruaitu pahnihte awmlai hian thawhdunna tur inremna thuthlung ziah a ni a. Agriculture research leh education te, maritime heritage, damdawi siamna thlai bakah Prasar Bharati leh Voice of Vietnam ten MoU an ziak a ni.

Thuchhuah siamin Prime Minister Narendra Modia chuan India-Vietnam inlaichinna chu kum 10 chungin a thukin a nget telh telh a ti a. Ram pahnih sumdawntawwna pawh zaa 85 in a thang a ni a ti bawk..

<><><>

#### PARIS OLYMPIC

Paris Olympics 2024 ah vawiin khan Indian shooter Swapnil Kusale chuan bronze medal a la. Mipa 50m rifle 3 position-ah pathumna niin Indian zinga 50m rifle 3 position-a India tana medal la hmasa ber a ni. Hetihlai hian Nikhat Zareen chuan 50kg boxing ah Chinese boxer Wu Yu a hneh lo a. Mipa Hockey team ten Group B qualifier-ah Belgium an hneh lo bawk a ni.

<><><>

#### KERALA LANDSLIDE

Kerala-a leimin tuarte chhanchhuah hna ngawrh takin kalpui zel a ni a. Wayanad district-a Mundakkai, Attamala leh Chooralmala-ah te leimin hi an tuar nasa a. Police te chuan vawiin thlenga thi zat chu 260 an nih thu an sawi a. Heng zinga ruang 99 chu tunge an nih finfiah ala ni lo a.

Wayanad leiminah hian Indian Air Force (IAF) te chuan chhanchhuah hna ngawrh takin an thawk nghal a. Anni bakah hian NDRF leh agency dangte pawh an thawk a ni. IAF te hian C-17 thlawhna hmangin chhanchhuahna leh chhawmdawlina bungraw hrang hrang an phurlut a. AN-32 leh C-130 hmangin bungrua leh mihring thiar luh an ni bawk.

<><><>